

SCHROTT - SCHNITZELBÄNKE JUBILÄUM 2024

Schrott isch do, Schrott isch cho
Um wieder öpper abe z'lo
Schrott isch do, Schrott isch cho
Jo jetze si mer do
Dä Schrott - wo mir jetz vo n'is gäh
Dörft Dir nid z'fescht z'Härze näh
S'isch Narrezyt - s'isch Fasnachtszyt

Händy-Akku läär - ha kei Netz
System abgstürzt - s'isch hütt komplex
Was ässe - dir der Apple seit
Im Dr. Google fingsch dini Chrankheit

D's letscht Mou live - ou wägem Beizeschtärbe
Üs hei si scho d's Biberist wöue abwärbe
Äs geit wiiter - Chat GPT fingt scho dr Rank
Chasch äs streame - KI singt de d'Schnitzubank

RBS-Stumpengeleise

Melodie: Coiffeur, Mani Matter

Am Bahnhof bini gstande - uf Gleis 2 gäg Soledurn
Do chunnt no ä Kolleg derzue und schnurret mi haub Sturm
Zum Glück chunnt aber gli drufabe de scho grad der Zug
Mir stige i und schnurre witer - d'Ziit vergeit im Flug

Jetzt fahrt är ab und los geit's zackig uf die planti Reis
Doch bau scho brämst är ab und steit ganz reglos uf em Gleis
Nid Lohn, nid Biberist - bir neue Halle blibt är stoh
Die Reis hett aber jetze ou gar schnäu äs Ändi gnoh!

Jetzt dämmeret üs beidne ändlech ou was do isch gscheh
Mir näme s'Schicksal a und schuene drum haut - oh herrje
Zum Bahnhof zrüg - dert wo mir äbe vori grad si gsi
Do fahrt ganz fräch scho grad der rähti Zug a üs verbii

Uf grosse Bahnhöf hesch du mängisch hunderti vo Gleis
Du luegsch wo häre muesch u loufsch nid sinnlos im ne Kreis
Bi üsem schöne Bätterkinde gits dervo nur zwöi
Mi fragt sich nur - wie himustärne - gits ä so nes Ghöi?

Äs isch drum a däm Bahnhof äbe neuerdings e so
Dass d'RBS äs richtigs Stumpegleis hett übercho
Do fahre mängisch d'Züg dert aube nume hin und här
drum lueg ä chli desume - was dert steit - s'isch nid so schwär!

Turnhalle

Melodie: Basler - c-fff-f-aa-g-f-d-dd-f-b-b

Bim Schueuhus unge wird jetz ändlech bout die nöi Turnhaue
Chli länger, aus geplant - denn schliesslech söu's ou aune gfaue
Äs rückt jetzt chli vora - die nöie Schibe scho montiert
Doch nid ufpasst - scho arg verchrauet - wo me betoniert

Am Obe cha me z'Liecht nid lösche - niemer cha das richte
Bim Linder schäuet z'Telefon - viu Lütt wei ihm das brichte
Do lot är eifach d'Store abe - so dass me's nümme gseht
Ir Nacht chunnts tou cho chutte - d'Store - «vom Winde verweht»

No nid ganz fertig - tuet me de die Haue übergäh
Für zueche z'cho muesch leider immer no der Kieswäg näh
U d'Schlüssle fähle ou no au - s'isch kompliziert zum gschplisse
Der Abwart muess au Tag go putze - äs isch doch zum Schiesse

Ä so ne Bou tuet hüttigs Tags ä grossi Summe choschte
S'wird immer aues tüurer - gseh's jo säuber wenn tuesch poschte
Drum fragt me hingedri - denn mit em Gäud geits nümme so ring
Diversi Institutione - für n'äs Sponsoring

Öppis vor RBS

Melodie: Wilhelm Tell / Mani Matter

Si hei ä nöie Bahnhof bout - mit Glasdach obe drah
das isch ou nid ganz gratis gsi - zauht hei das Frou u Ma
doch gli scho hett me witer plant - äs müessi si - und so
isch bau druf abe s'Gschtürm losgange wägem Zug-Depot

Äs Hin und Här - ob Ja, ob Nei - ob wie und - überhaupt
Der Gmeindrot hed dr RBS - denn gli scho chli misstrout
Im Dorf het's gli zwöi Lager gä - dergäge und derfür
Der langen Rede kurzer Sinn: - das Wärch steit vor der Tür

Ä graue Tag im März isch's gsi - ä Fritig obedri
Das Zügli isch vo Soledurn - nach Bärn am Fahre gsi
Äs Sturmtief hett z'Gänf Alouf gno - und dräiht sich wiud im
Kreis
Und z'Büre vor em Dorf - hout's üses Zügli us em Gleis

Jetzt cha me so ne Gschicht natürlech - so gseh - oder so
Zum Bispiu aus nes Zeiche - dass das Depot nid söu cho
Doch andersits schätzt me der ÖV sehr - und nutzt ne gärn
Ob Bätterkinde - Soledurn - oder sig's gäge Bärn.

Öppis vo de Wahle

Melodie: Auf de schwäbsche Eisenbahne

Im Kanton Bärn - vo Oscht bis Wescht
Versprüche am Strasserand - nume s Bescht
Die Gringe vom Süde bis i Norde
Für d'Wahle - isch ganz gross agrüehrt worde

Töu hei ä Schwetti uf de Plakat
Verschwänderisch - isch dä Kopfsalat
Anger Idee - si kreativ
Im Waukampf si sie sehr aktiv

Uf Paloxe - Plakat - i Härdöpfuform
D Würkig isch gross - s faut uf enorm
Die fähle de Bure - zum Härdöpfu grabe
Derfür lächlet - Ruedi Fischer abe

Bärner Bananengate

Melodie: Day-O → Banana Boat Song / Harry Belafonte

Daaay o - daaay o - mit de Spese isch's so ne Sach
Day - mis a day, mis a day, mis a day, mis a day, mis a daaay o
Das z'handhabe - muesch si vom Fach

Ä schwarzi Kluft, ä dicke Chare
- Bärner-Regierigsrat sött me si
Sie zeige üs, wie me Gäud cha spare
- als Bärner-Regierigsrat bisch derbi

Hie äs Sandwich - dert no ä Banane
- das chasch aues uf d'Spese näh
Do äs Apéro - ou für die Vegane
- d'Quittig sofort ar Verwautig gä

Ä Louge-Bretzen - derzue chli Wysse
- Bärner-Regierigsrat sött me si
Mit Spese chasch du vieles erbschisse
- als Bärner-Regierigsrat bisch derbi

Hütt äs z'Nüni - morn no dick go ässe
- wenn's grad breicht, no mit paarne Gescht
Säuber zahle - das chasch grad vergässe
- o wenn's git chli äs grössers Fescht

Fasch zwöihundertachtzgtuusig Lohn
- Bärner-Regierigsrat sött me si
Ohni rot z'wärde - s'isch ä Hohn
- als Bärner-Regierigsrat bisch derbi

Interna

Melodie: Der Hans Jakobli und s'Babettli / Mani Matter

S'isch Afangs Februar und Winter
Doch nümme lang - scho gli verschwindt'är
Do chunnt's em Gasche und em Röösl
no ds'Sinn - sie müesste no id Hösl

So mängi Gschicht isch offe blibe
wo mir in Värsform chönnte schribe
Äs Liedli eifach und igängig
dervo si no äs paar Fäll hängig

Doch aues das hett jetzt es Ändi
Kei Beizefasnacht - das isch d'Wändi
Drum gniessit no was mir verzöue
Mir hätte gärn no witer wöue

Umbau Tea Room Knuchel

Melodie: Auf de schwäbsche Eisenbahne

Ds Bätterchinge - wird ä markante Bou saniert
Gschpässig gseht's us - wie unorganisiert
D Fänschter useschriisse - das isch ersch dr Start
De chunnt das Projekt - ersch rächt in Fahrt

Gschpitzt wird krass - mit em Abbouhammer
Bode, Mürli, Fänschtersturz - g'heit eis nach em Anger
Bis die Hütte - nume no i de Egge schteit
Wo isch do dr Zueständig - für d'Sicherheit

Übers Trottoir loufe - die meischte Lüt mit ihrne Ching
Uf dr Gägesite - us Angscht - ds Huus g'hei ihne uf e Gring
Nach em Boustopp chunnt Ornig - i die ganzi Sach
Vom Tea Room isch d'Red - s'hett jo jetz äs Grüscht bis ungers
Dach

Us de eigete Reihe

Melodie: Basler - c-fff-f-aa-g-f-d-dd-f-b-b

Zwe Schiitäg planet eine i - u dänkt sich nüt derbi
Für sini Bude - aber Halt - do isch doch öppis gsi
Vom TV Messen isch doch Houptversammlig ou no denn
Är notabene Präsidänt - sött är doch wüsse - wenn

Doch das isch no nid aues - jetze chunnt no grad der Hit
Wott är i's Dütsche mit de Schrottofoniker denn mit
Jetzt isch är vou im Seich - är ma das Gstürm nümme ertrage
Der Lüthi Pädi würd doch gschider sini Frou zersch frage

Oder no dä...

Melodie: Basler - c-fff-f-aa-g-f-d-dd-f-b-b

Als Präsidänt - die letschti Gmeindratssitzig isch verbi
Nach so viu Jahre i sim Amt - drum fiiret me no chli
Bim hei go - der nöi Präsi - de vom Aute hei chauffiert
Hett Linder - am Briefchaschte - si nöi Wage demoliert

Schluss-Song

Melodie: 40 Jahre die Flippers

Wir sagen Dankeschön - 40 Jahre die Schrottis

Was wär'n wir ohne uns're Freunde, ohne euch ihr lieben Fans

Wir sagen Dankeschön, 40 Jahre die Schrottis

Und, dass wir heute wieder hier sind, das verdanken wir nur euch

Wir sagen Dankeschön - 40 Jahre die Schrottis

Einfach nur Dankeschön - 40 Jahre die Schrottis

Äs darf ä Frou - nümme z'Fasnacht cho
Wiu denn - gärn d'Bänder lö lo go

End:

Wenn me - wie mir - us wohre Gschichte Värse dichtet
Vo coole Stories und Begäbeheite brichtet
De cha's passiere, dass es plötzlich afot liire
Drum höre mir jetz uf und göh no chli go fiire

Danke
Schnitzelbankgruppe Schrott